

# MASINA MARIA RENIN'ANDRIAMANITRA - TAONA A



## ***RENIN'ANDRIAMANITRA SY MPANJAKAVAVIN'NY FIADANANA I MASINA MARIA***

Ry Kristianina havana, mbola anatin'ny fankalazana ny fetin'ny Noely isika amin'izao andro voalohany taona "1er janvier" izay ankalazantsika an'i Masina Maria Renin'Andriamanitra ka ankaravoana sy ankafaliana no hiarahabana atsika oloaraiky jiahy.

Izao voalohan-taona izao dia fankalazana telo sosona no ataontsika :

Vakiteny I : Fan. 6, 22-27  
Tononkira : Sal. 66,  
Vakiteny II : Gal. 4, 4-7  
Evanjely : Lk. 2, 16-21

- 1- Andro voalohany Janoary, voalohan'ny taona araka ny "calendrier civil" fa araka ny calendrier liturgique dia efa nankalazantsika izany tamin'ny Alahady voalohan'ny Fiaviana taorian'ny fankalazanatsika

an'i Kristy mpanjaka ary nankantsika lohahevitra hanohizana ny fiainana ny taona masina famindrampon'Andriamanitra eto anivon'ny Ekleziastika avaratra izany hoe ny diosezy Mahajanga, Port-berger, Ambanja ary Antsiranana.

I Jesoa no endriky ny famindrampon'Andriamanitra ka noraisintsika ho halalinina mba

hivelomantsika an'izay rehetra niainantsika nandritra ny taona masina ny lohahevitra hoe: "I Jesoa velona eo anivontsika miara-dàlana amintsika".

2- Izao 1er janvier izao no hibanjinantsika bebe kokoa ka hampidirintsika i Jesoa amin'ny ataontsika sy ny fiainantsika rehetra, tsy i Jesoa lavitra fa i Jesoa eto anivontsika, miara-dàlana amintsika izy.

Ny firariana amin'izao taona vaovao izao dia ny mba ho eo anivontsika lalandava i Jesoa sy hiara-dàlana aminy isika amin'ny taona ity sy ny taona rehetra mitsingeringerina.

Na dia eo aza ny zavatra mety manahirana, mitondra fahasahiranana dia hahatoky isika fa ilay nilaza tamintsika hoe : "Mankanesa aty amiko ianareo izay manana entana mavesatra fa hanamaivana anareo aho". Raha miaraka amintsika tokoa i Jesoa na dia eo aza ny entana mavesatra dia izy no mibaby atsika araka ny hitantsika amin'ny sarin'ny logo famindampo sy mitondra atsika amin'ny fiainana tsaratsara kokoa, araka ny loko ny lanitra manga izay hitantsika koa amin'ny logo famindrampo.

3- Anio voalohan'ny volana Janoary ihany koa no ankalazantsika an'i Masina Maria Renin'Andriamanitra, ary dia mifanojo amin'izay lohahevitra izay ny fankalazana ataontsika androany. Matoa ny Eglizy nanokana andro hibanjinana an'i Masina Maria Renin'Andriamanitra dia satria araky ny fantantsika ary mbola miseho amin'izao fotoana izao, misy hevitra mifamahofaho mikasika an'i Masina Maria ka namaritra momba an'izany tokoa ny Eglizy mba ho finoana matotra tsara ny finoana hivelomantsika ka hahatonga an'i Jesoa eo anivontsika. Lazaina Renin'Andriamanitra i Masina Maria satria renin'i Jesoa izy. I Jesoa dia Andriamanitra. Rehefa nasongadina araka ny teny finoana ny maha Andriamanitra an'i Jesoa dia noraisina ihany koa ny maha renin'Andriamanitra an'i Masina Maria ka izao voalohan'ny taona izao no ankalazana azy eo anivon'ny Eglizy. Hanambarana ihany koa fa miaraka an'i Masina Maria isika hamakivaky ity taona ity ary izy ny hitondra atsika ao amin'i Jesoa. Raha ao amin'i Jesoa isika dia hahita ny làlan-kombana, hahita ny tena fiainana, hahita ny fahamarinana. Renintsika ihany koa i Masina Maria, fantantsika fa i Jesoa nanolotra azy an'i Joany ary i Joany nandray an'i MASINA MARIA tao antranony.

Aoka isika amin'ity andro voalohany volana janoary ity hampandroso an'i Masina Maria, raha mampandroso azy isika dia mazava ho azy fa ao antranontsika i Jesoa. Renintsika tokoa izy ka hikolokolo ka hizara amintsika ny tena fiainana ao amin'i Jesoa.

Izany no nahatonga an'ny Eglizy nanombokan tamin'ny fotoanan'i Papa Paoly VI nifidy ny andro voalohan'ny taona ho andron'ny fandriam-pahalemana. Raha ilay mpanjakavavin'ny fandriam-pahalemana no eo anivontsika mandritra ny hamakivakantsika ny taona sy ny taona mitsingerina dia hiaina ao anatin'ny fiadanana sy fandriam-pahalemana isika.

Isan-taona dia manome lohahevitra ny Papa ka tiany ampitaina amintsika amin'izao taona vaovao izao ary dia ny fahaizantsika mandray vahiny. Izany dia mitondra atsika amin'ny làlan'ny fandriam-pahalemana.

Maro ny vahiny mandalo amintsika ary marina fa amin'ny teny malagasy ny vahiny dia tsy ny "etranger" fotsiny fa izay rehetra tsy miaraka mitoetra amintsika andavanandro na ny havantsika

akaiky aza. Aoka ary hahay handray vahiny isika, hanasoa azy, amin'izay dia tahaka ny mandray an'i Jesoa koa isika satria izy dia mitoetra amintsika tsirairay avy.

Ry Kristianina havana, efa voasoritra izay ny lalan-kombantsika ary izay ihany koa ny firariantsoa ataoko amintsika : Enga anie hahay hifandray isika ary ataontsika eo anivon'ny fifandraisantsika i Jesoa ary i Masina Maria hanampy atsika amin'izany ka hihavao ny fifandraisantsika amin'Andriamanitra. Hirindra tsara izany satria ilay mpanjakan'ny fiadanana no eo anivontsika. Hiova koa ny fifandraisantsika samy olombelona satria ilay endriky ny famindrampon'Andriamanitra no eo anivontsika ka hifanasoa isika ao anatin'ny fahamarinana sy fampanjakana ny rariny sy ny hitsiny ary anatin'ny fikatsana mandrakariva ny soa iombonana.

Hiova koa ny fifandraisantsika amin'ny zavaboahary, toy izay hanapotika isika dia hanasoa sy hanatsara araka ny lohahevitra nofidintsika tanora eto amin'ny diosezy : “Sambatra ny malemy fanahy fa handova ny tany izy”. Raha hetraketraka na herisetra no eo anivon'ny fiainantsika fa tsy i Jesoa izay nilaza amintsika hoe “Mianara amiko fa malemy fanahy sy manetry tena aho”, raha i Jesoa no ianarantsika sy fahendrena ho antsika dia ho lavitra ny herisetra, ny hetraketraka, ny doro tanety sy ny tevy ala ary fantantsika ny vokatry ireny doro tanety ireny fa mahamainty ny tontolo iainana.

Ho maitso ny fiainantsika raha isika araka ny ezaka iriko ataontsika fa indrindra amin'izao fotoana fahavaratra izao dia ny hamboly hazo. Aoka isika hanana risipo amin'ny fambolen-kazo amin'izay ho maitso feno fanantenana ny fiainantsika. Ny fanantenana no tsy mamitaka fa ny fijerena an'izao sy izao mety mamitaka ary indrindfra fa ny fanantenana ao amin'Andriamanitra tsy hamitaka na oviana na oviana. Raha eo anivontsika i Jesoa dia hiova koa ny fifandraisantsika amin'ny tontolo iainana ka hanaja an'izany isika ary hanasoa ka ho feno fanantenana izao taom-baovao ho antsika izao.

Ry Jesoa zokinay ô, ianao tokoa no mpanjakan'ny fiadanana, ianao tokoa no eto anivonay, ianao no hiaraka aminay hamakivaky an'ity taona vaovao ity ka enga anie ho feno ny fahendrenao izahay ka hahay hifanaja dia hiova tokoa ny fifandraisanay amin'Andriamanitra, ho vonona hanatanteraka ny sitrak'Andriamanitra tahaka an'i Masina Maria izahay, izy ilay reninay mikolokolo anay koa. Amin'izay izahay hahay hifandray tsara araka ny maha zanak'Andriamanitra anay ka hifanasoa fa tsy hifanapotika ary hahay hanaja ny aina mandritra ity taona ity sy ny taona manaraka rehetra. Noho ny fahendrenao sy ny fampianaranao dia hahay hanaja ny tontolo iainana izahay araka ny hafatrao “Sambatra ny malemy fanahy fa handova ny tany izy”. Amin'izao taona vaovao 2017 izao dia hankalaza ny JMJ eto amin'ny diosezy izahay tanora ka apetrakay eo am-pelantananao izany satria izahay no handova ity tany ity ka enga anie izahay hanana an'izay fahalemam-panahy sy fanentrentena araka ny fampianaranao izany. Amen